

Comision Celebracion Dianan Nacional

Awe 16 di Maart ta exactamente 30 aña pasa cu Eilandsraad a aproba pa Aruba tin su propio Himno y Bandera

STA. CRUZ--Despues cu Aruba for di aña 1948 a wordo perhudica den e constelacion Antiyano di 12-8, nada particular mas a sosode den e añanan siguiente riba tereno politico estatal. E lucha di antes, esta Separacion no tabata vibra cu fervor mas bao di e partidonan politico di e tempo ey y nan enfoka tabata meramente dirigi pa bringa pa interesnan di diferente agrupacion cu tabata biba riba e isla aki, tanto esnan nativo como esnan cu a bin for di exterior. For di inicio di su carera politico nos Libertador Betico Croes a constata cu tabata existi e division aki, caminda constantemente tabata haci distincion den ascendencia, color, raza y entre e hendenan di e diferente districtonan di Aruba. E division y

segregacion aki a perhudica nos isla grandemente ya cu e parti negativo aki a stroba e pueblo Arubano di forma un bloke solido pa lucha y sali for di e constelacion Antiyano. Como un visionario Betico Croes su meta principal den e arena politico tabata pa trece union den e pueblo aki, caminda no ta existi mas e distincionan ya menciona. Hecho ta cu den un pais, unda ta reina un deseo ferviente pa sali for di e constelacion Antiyano pa bira un pais autonomo, mester busca na prome lugar di promove e simbolonan di union y libertad.

Dia 16 di Maart 1976 - despues cu Bestuurscollege a nombra un comision pa conseha riba nos Himno y Bandera - Eilandsraad di Aruba a aproba e proposicion



pa introduci nos simbolonan di union y libertad, cual simbolonan a wordo inaugura oficialmente riba dia 18 di Maart 1976 den Wilhelminastadion.

Mantencion di nos Status Aparte

Manera ta conoci caba, den pasado politiconan a trata na salvaguardia e posicion di Aruba den e constelacion Antiyano, unda nos pueblo a ser hinca den un sistema cu nos ta minoria den gobierno y Parlamento.

No esaki so, pero Aruba no tabata tin e instrumentonan densumanpapordeterminasu propio desaroyo economico. E situacion aki a perdura for di 1948 te na e Conferencia di Mesa Rondo na 1983, unda na un forma magistral Betico Croes a demostra su cualidadnan pa negocia, logrando cu nos isla a haya reconocimiento di e derecho di autodeterminacion.

No solamente a ser conveni cu nos isla por bira independiente na 1996, pero cu nos pais entrante 1 di januari 1986 por haña su Status Aparte como fase transitorio. Tambe cu nos lo haña e oportunidad promer cu 1996 pa evalua si nos ta suficientemente prepara y cla pa bira independiente. Ta mas cu logico cu Betico

Croes a usa e strategia di busca reconocimiento di e derecho di autodeterminacion pa por a sali na 1986 for di e constelacion Antiyano y despues mira si nos ta suficientemente prepara pa por bira independiente.

Y tabata dia 13 di Juli 1990 cu Ministo Presidente Nelson Oduber a yega na un acuerdo cu gobierno Hulandes pa percura saca e fecha di independencia di 1996 for di den Statuut, peromanteniendo si e derecho pa cu dia nos na un forma organiza, ordena y responsabel por bira independiente y cu sosten di mayoria di e pueblo nos lo

por haci esaki.

Nos a logra convence Hulanda y Antiyas pa cambia Statuut y trece e claridad, seguridad y trankilidad riba tereno di estructura estatal pa nos pueblo, unda nos pais a mantene su Status Aparte.

Nos pais awe tin su propio Parlamento, Gobierno, institutonan, propio bandera, himno, ortografia, propio Banco Central, moneda etc.

Ta pesey ban celebra awe na San Nicolas y mañan y otro mañan riba Plaza Libertador Betico Croes na grandi nos dia nacional, 20 aña di Status Aparte y 30 aña di Himno y Bandera.